

四庫全書

集部

欽定四庫全書

集部

蘇詩補註卷四十五

詳校官庶吉士_臣李傳熊

檢討_臣何思鈞覆勘

總校官原任中允_臣王燕緒

校對官中書_臣王家賓

謄錄監生_臣武先振

欽定四庫全書

蘇詩補註卷四十五

翰林院編修查慎行撰

古今體詩四十二首

起徽宗建中靖國元年辛巳春自南安歸常州終是年七月

慎按傳添紀年錄辛巳正月五日先生過南

安軍作至南安詩王宗稷年譜亦云先生正

首過南安有過嶺至南安詩今刻本皆無

留題顯聖寺

渺渺疎林集晚

一作晚

鴉孤村煙火梵王家幽人自種干

頭橘遠客來尋百結花浮石已乾霜後水焦坑一作溪閒

試雨前茶祇疑歸一作不夢西南去翠竹江村一作邊繞

白沙

顯聖寺

名勝志南安府南康縣西三十里有浮石形如覆鐘水環其外為上游勝境上有唐時顯

聖院宋建中靖國辛巳子瞻檄舟訪元師題壁詩云云南安志以為南唐保大中建浮石注見上

焦坑

志又云焦溪在南康縣南三十里源出鍋坑至浮石入章水雨前茶茗溪漁隱叢話

水揀茶即社前者生揀茶即火前者麤色茶即雨前者學林新編火前謂寒食前雨前謂穀雨前

予初謫嶺南過田氏水閣東南一峯豐下銑上里

人謂之雞籠山予更名獨秀峯今復過之戲留一

絕

倚天巉絕玉浮圖

一作屠

肯與彭郎作小姑獨秀江南知

有意要三二別四三壺

一本作要令人別四方壺訛

田氏水閣

南安志南康縣東七十步有蘇步坊蘇子瞻南遷經此過田如鼇六經堂留題因名

坊側有井深而列石底如盤九竅泉自中湧出

雞籠山

志又云獨秀峯在縣東南二十五里俗名

雞籠山下有龍湫

三壺

拾遺記三壺海中三山也一曰方壺則方丈也二曰蓬壺則蓬萊也三曰瀛壺則瀛洲也形如壺器上廣下狹而方按燕丹子云高欲今四三王下欲今六五伯困學紀聞云四三

瀛壺則瀛洲也形如壺器上廣下狹而方按燕丹子云高欲今四三王下欲今六五伯困學紀聞云四三

墳六五典三二曜六五緯先生此詩結句正同此
解二別謂大別小別三壺謂方壺蓬壺瀛壺也

寄題潭州徐氏春暉亭

瞳瞳曉日上三竿客向東風競

別本作
竟訛

倚欄穿竹鳥聲

驚步武入簷花影落杯盤勿嫌步月臨玄圃冷笑乘槎
向海灘勝概直應吟不盡憑君寄與畫圖看

慎按此詩施氏原本不載據外集編南歸度
嶺卷中今從之

乞數珠贈南禪湜老

從君覓數珠老境仗消遣未能轉千佛且從千佛轉儒
生推變化乾策數大衍道士守玄牝龍虎看舒卷我老
安能為萬劫付一喘嘿坐閱塵界往來八十反區區我
所寄感縮蠶在繭適從海上回蓬萊又清淺

數珠

翻譯名義錄塞莫或云阿利叱迦二合此云數珠木穗子當貫一百八個常自隨身志心稱佛

陀達摩僧伽乃過一子具如彼經

南禪

按本集有虔州崇慶院藏經記序湜長老勅建寺南禪即

崇慶也考志亦名蘆泉院

湜長老

注詳本卷清隱老下

轉佛

翻譯名義轉佛心中化他之法

度入他心名轉法輪

鬱孤臺

公自注再過
虔州和前韻

吾生如寄耳嶺外亦閒游
贛石三百里寒江尺五流
楚山微有霰越瘴久無秋
望斷橫雲嶠魂飛咤雪洲
曉鐘時出寺暮鼓各鳴樓
歸路迷千嶂勞生閱百州
不隨猿鶴化甘作賈胡留
祇有貂裘在猶堪買釣舟

鬱孤臺

注見前

三百里

虔州志贛州水在府城北章貢二水會處北流至萬安縣其間

有九灘若上水之信豐寧都石磧尤險故俗稱上下三百里贛石孟浩然詩贛石三百里沿洄千嶂間

虔守霍大夫監郡許朝奉見和此詩

一本無此復詩二字

次前韻

大邦安靜治小院得閒游
贛水雨已漲廉泉春未流
同烹貢茗雪一洗瘴茅秋
秋思生尊鱠寒衣待橘洲
揚雄未有宅王粲且登樓
老景無多日歸心夢幾州
敢因逃酒去端為和詩留
舊篋藏新語清風自滿舟

霍大夫

虔州志霍漢英字子倬紹聖間知虔州

許監郡

名失考

廉泉

在虔州報

恩寺注見

三十八卷

贈虔州術士謝晉臣

屬國新從海外歸君平且莫下簾帷前生恐是盧行者
後學過呼韓退之死後人傳戒定慧生時宿直斗牛箕
憑君為算行年看便數生時到死時

盧行者

高僧傳慧能姓盧氏往韶陽遇劉志畧劉有姑恒讀涅槃經能聽之即為尼辨析中義尼

深嘆服號

戒定慧

楞嚴經攝心為戒因戒生定因定發慧

虔州

注詳本卷再和

霍大夫詩虎

頭州條下

按此詩五六聯分承三四兩句末一句又總結五十六章法道緊

虔州景德寺榮師湛然堂

卓然精明念不起兀然灰槁照不滅方定之時慧在定
定慧照寂非兩法妙湛總持不動尊默然真入不二門
語息則默非對語此話要將周易論諸方人人把雷電
不容細看真頭面欲知妙湛與總持更問江東三語掾

景德寺

輿地紀勝景德寺劉朱建舊名安天在虔州府治東南隅地勢夷曠瞰覽城南山水梵宇

壯麗以間計者二千六百佛像萬餘黃山谷詩城東寶坊金碧重即此也虔州志謂唐德宗貞元三年建

所未詳

卓然兀然

按卓然精明而念不起兀然灰槁而照不滅二法相反當融為一黃睢道

人語也

照寂

楞嚴經注即寂而照曰妙明即照而寂妙曰明妙寂則三諦俱寂明則三諦俱照

湛總持

楞嚴經注妙湛贊真諦般若德也總持贊俗諦解脫德也不動贊中諦法身德也即三而

一故曰妙湛即一而三故曰總持非三非一故曰不動

默然

維摩經時維摩詰默然無言文殊師

利歎曰乃至無有文字語言是真入不二法門

次韻陽行先

公自注用鬱孤臺韻

室空惟法喜心定有天游摩詰原無病須洹不入流苦

嫌尋直枉坐待寸田秋雖未

虔州志作未入

麒麟閣已逃鸚鵡

洲酒醒風動竹夢斷月窺樓衆謂元德秀自稱陽道州

拔葵終相魯辟穀會封侯用舍俱無礙飄然不繫舟

陽行先

宋史陽孝本字行先贛州人學博行高隱于城西通天巖蘇軾自海外歸過而愛焉號之

曰玉巖居士隱遯二十年崇寧中舉八行解褐以直秘閣歸

元德秀

唐書元德秀字紫芝母亡

以不及親在而娶不肯婚人以為不可絕嗣答曰兄有子先人得祀吾何娶焉田汝成志餘曰陽行先平生不娶東坡直造其室嘗以元德秀呼之居士曰某乃陽城之裔故坡詩衆謂元德秀自稱陽道州皆謂其無妻也

再用數珠韻贈湜老

嗣宗雖不言叔寶猶理遣東坡但熟睡一夕一展轉南
遷昔虞翻却掃今馮衍古佛既手提諸方皆席捲當年

清隱老鶴瘦龜不喘和我彈丸詩百發亦百反耆年日彫喪但有獨角爾時來窺方丈共笑虎毛淺

清隱老

本集崇慶禪院藏經紀畧云吾南遷過虔州訪廉泉入崇慶院于江南壯麗為第一其費

二千餘萬前長老曇秀始作之幾于成而寂今長老惟湜嗣成之先生又有湜長老真贊云道與之貌天與之形雖同乎人而實無情彼真清隱何殊丹青日照月明雷動風行夫孰非幻忽然而成此畫清隱可謁雨晴據此則清隱當是惟湜之號

虎毛淺

詩淺幘傳淺虎皮淺毛也

和猶子遲贈孫志舉

軒裳大爐鞴陶冶一世入從橫落模範誰復甘饑貧可

憐方回癡初不疑嘉賓頗念懷祖黠嗔兒與兵姻失身
墮浩渺投老無涯垠回看十年舊誰似數子真孫郎表
獨立霜戟交重閨深居不汝覲豈問親與隣連枝皆秀
傑英氣推伯仁我從海外歸喜及崆峒春新年得異書
西郭有逸民公自注陽行先以登真隱訣見借小孫又過我歡若平生
親清詩五百言句句皆絕倫養火雖未伏要是丹砂銀
我家六男子朴學非時新詩詞各璀璨老語徒周諄願
言敦宿好永與竹林均六子豈可忘從我屢厄陳

孫志舉

按孫立節字介夫二子一名總字志康一名勳字志舉見虔州志

崆峒

虔州志空

同山在城南六十里一名空山章貢二水夾以北馳一郡之望也山麓周回百里

登真隱訣

舊唐書經籍志登真隱訣六十卷陶弘景撰

南禪長老和詩不已故作六蟲篇答之

鳳凰覽德輝遠引不待遣鷓鴣戀庭宇倏忽來千轉那
將坐井蛙而比談天衍蠹魚著文字槁死猶連卷老牛
疲耕作見月亦妄喘東坡方三問南禪已五反老人但
目擊侍者應足繭最後六蟲篇深寄恨語淺

慎按本題云六蟲篇而詩中止及五種豈以鳳皇為二耶殊不可解

明日南禪和詩不到故重賦數珠篇以督之二首
未來不可招已過那容遣中間見在心一一風輪轉自
從一生二巧歷莫能衍不如袖手坐六用都懷卷風雷
生聲歎萬竅自號喘詩人思無邪孟子內自反大珠分
一月細綆合兩繭累然挂禪牀妙用夫豈淺

風輪轉

大集經有風能上有風能下心若念上風隨心牽起心若念下風隨心牽下轉運所作皆

是風隨心轉

朝來取飯化乃是維摩遣金鋒雖未露半藏已曾轉說
有陋裴頠談無笑王衍看經聊爾耳遮眼初不卷三咤
故自醒一呌何由喘請歸視故櫝靜夜珠當反安居三
十年古衲磨山繭持珠尚嘿坐豈是功用淺

維摩遣

維摩經汝往上方界分有國名衆香佛號香積汝往到彼稽首世尊願得世尊所食之餘

當于娑婆世界施作佛事

一呌

莊子道仁義于戴晉人之前猶劍首之一呌也

山繭

翻譯名義

蟲衣謂用野蠶絲綿作衣天竺有國名烏陀粳米欲熟葉變為蟲蟲則食米人取繭蒸以為綿

用前韻再和霍大夫

文字先生飲

公自注謂劉執中

江山清獻遊典刑傳父老尊俎

繼風流度嶺逢梅雨還家指麥秋自慚鴻雁侶爭集稻

梁洲野濶橫雙練城堅聳百樓行看鳳尾詔却下虎頭

州君意已吳越我行無去留歸途應食粥乞米使君舟

文字飲

韓愈詩不解文字飲惟能醉紅裙

清獻遊

虔州志趙抃西安人嘉祐六年為右

司諫極論內侍出知虔州按清獻集章貢臺記畧云予嘉祐六年夏以言事出守虔州始至視事屬歲穰

盜息英僚嘉賓間為游觀云云集中又有虔州即事鬱孤臺章貢臺諸什

虎頭州

元和郡縣志晉

南康郡宋南康國隋改虔州熊克中興小歷云紹興二十三年校書郎董德元上言虔州號虎頭城非佳

名也。今天下舉安獨此郡有小警意，其名有以兆之。既而廷臣議亦謂有虔劉之義，遂改名曰贛州。因古縣為名。○按虎頭州即虔州也。趙清獻守虔州，詩虎頭城裏人煙濶，馬祖巖前氣象豪。二句可証王氏注以虎頭州為常州，因顧愷之得名。劉辰翁雖加評駁，未詳出處，今駁正。

用前韻再和許朝奉

高門元世舊，客路晚追游。清絕聞詩語，疏通豈法流。傳家有衣鉢，斷獄盡春秋。邂逅陪車馬，尋芳謝朓洲。淒涼望鄉國，得句仲宣樓。恨賦投湘水，悲歌祀柳州。何如五字律，相與一尊留。更約登塵外，歸時月滿舟。

塵外

亭名南康八境之一也注見前

按趙彥村云凡詩四句以第一句對第三句以第二句對第四句謂之扇對蓋始于白氏金針胡仔云杜少陵哭鄭少監詩得罪台州去時危棄碩儒移官蓬閣後穀貴歿潛夫則前此已有之不始于白氏矣篇中邂逅四句
正用此格

用前韻再和孫志舉

人衆者勝天天定亦勝人鄧通豈不富郭解安得貧
驚飛賀厦燕走散入幕賓醉眠中山酒結夢南柯姻
寵辱能幾何悲歡浩無垠回視人間世了無一事真
洒掃古

玉局香火通帝閭我室思無邪我堂德有隣所至為

一作

無訛鄉里事賢友其仁之子富經術蔚如井大春蛭螳楚

南極淑氣生此民唱高和自寡非我誰當親譬彼嶰谷
竹剪裁待伶倫俗學吁可鄙紙繒配芻銀聊將調癡鬼
亦復爭華新願子事篤實浮言掃謔諄窮通付造物得
喪理本均期子如太倉會當發陳陳

崔文學甲攜文見過蕭然有出塵之姿問之則孫
介夫之甥也故復用前韻賦一篇示志舉

象服盛簪珥豈是邢夫人敝衣破冠履可憐范叔貧君

看崔員外晚就觀國賓當年頗赫赫翁嫗爭為姻

公自注見

退之贈崔員外詩

蹭蹬阻風水橫斜挂邊垠青衫映白髮今似

梅子真道存百無害甘守吳市闥自言總角歲慈母為

擇隣邦人驚似舅矯矯惡不仁詩文非他師家法乃富

春豈非空同秀為國產雋民挺然齊魯生近出姬姜親

為文不在多一頌了伯倫清詩要鍛

一作陶

煉乃得鉛中

銀自我遷嶺外七見槐火新著書已絕筆一嘿含千諄

蕢桴和葦籥天節非人均時時自娛嬉豈為俗子陳

崔甲

失攷

孫介夫

虔州志孫立節字介夫寧都人皇祐進士王安石行新法欲以為條例司

立節曰當求勝我者若我輩人不肯為是官矣蘇文忠作剛說遺之崔員外名斯立字

有贈

踏蹬

杜甫詩青冥却垂翅踏蹬無縱鱗

蕢桴

禮記蕢桴而土鼓猶若可以致其敬

于鬼神疏云蕢讀為由謂搏土由為桴桴擊鼓之物也

戲贈虔州慈雲寺鑒老

一無戲字

居士無塵堪洗沐道人有句借宣揚
牕間但見蠅鑽紙門外惟聞佛放光
徧界難藏真薄相一絲不挂且蓬場

却須重說圓通偈千眼熏籠是法王

慈雲寺

輿地紀勝慈雲寺在贛州城東南舊名景德寺

鑒老

冷齋夜話東坡自海外歸至贛

上以水涸舟不得行時過慈雲寺浴其長老明鑒魁梧如世所畫慈恩然叢林以道學與之坡作詩戲之

云無塵堪洗

楞嚴經跋陀婆羅于沐浴時隨例入室忽悟水因既不洗塵亦不洗體中間安

然得無所有又傳燈錄石梯和尚因侍者請浴師曰既不洗塵亦不洗體汝作麼生蠅鑽紙燈

錄神瓚禪師一日坐牕下看經蜂子投牕紙佛放光

求出師曰世界如許廣濶不肯出鑽他故紙傳燈錄古靈行脚回受業師遣執役一日因澡身命

靈去垢靈乃拊背曰好所佛殿而佛不聖其師回首視之靈曰佛雖一絲不挂時中作麼生陸云一絲不

挂逢塲

傳燈錄鄧隱峯曰竿木隨身逢塲作戲

圓通偈

楞嚴經跋陀羅佛問圓通如我

所證觸因為上

熏籠

施氏注引釋氏通典云十六開士于浴堂證悟水因于熏籠焙浴具次得大安

樂

法王

大論佛為法王菩薩入正位乃至十地故悉名王子

慎按冷齋夜話載先生此篇窗間二字作舉

頭門外二字作拊背細觀詩中自起至末八

句中多用浴事與洪覺範語正合覽者不識

作家用意所在往往信口讀過特援據釋典

詳注之又按此詩施氏原本已載遺詩二十

九首卷中新刻本又重載續補下卷今為刪

去據時地改編

畫車二首

何人畫此隻

一作
騎

輪車便是當年歌器圖上易下難須

審細左提右挈免疎虞

隻輪車

東京夢華錄獨輪車前後二人把駕兩旁兩人扶拐前有驢拽謂之串車以不用耳子轉

也

九衢歌舞頌王明誰惻寒泉獨自清賴有千車能散福

化為膏雨滿重城

惻寒泉

易井卦九三井渫不食為我心惻可用汲王明並受其福又九五井冽寒泉食疏云剛正

之主不納非賢必須行潔才高而後乃用

虔州呂倚承事年八十三讀書作詩不已好收古

今帖貧甚至食不足

石刻題云呂夢得承事年八十三讀書作詩手不釋卷室

如懸罄但貯古今書帖而已作詩以示慈雲老師

揚雄老無子馮衍終不遇不識孔方兄但有靈照女家藏古今帖墨色照箱笥饑來據空案一字不堪煮枯腸

五千卷磊落相撐拄吟為蜩蛩聲時有島可句為語里
長者德齒敬已古如翁有幾人薄少可時助

呂倚

施氏補注本呂倚字夢得維揚人蹭蹬不遇老
始以恩補虔州瑞金縣簿有一女嫁贛人因居

焉。按承事其官階也職官
分紀寄祿文散官有承事郎

靈照女

傳燈錄龐居士
有女名靈照賣

竹瀝離以
供朝夕

王子直

一本作
立記

去歲送子由北歸往返百舍今又

相逢贛上戲用舊韻作詩留別

米盡無人典破裘送行萬里一鄒游解舟又欲攜君去

歸舍聊須與婦謀
聞道年來丹伏火
不愁老去雪蒙頭
剩買山田添鶴口
廟堂新拜富民侯

王子直

注見三十九卷

次韻江

宋文鑑作王訛

晦叔二首

人老家何在
龍眠雨未驚
酒船回太白
稚子候淵明
幸與登仙郭
同依坐嘯成
小樓看月上
劇飲到參橫

江晦叔

名公著桐廬人建中靖國初知虔州東坡北歸至虔晦叔適至未幾除廣東轉運判官此

段施氏原本所有
新刻刪去今補錄

鐘鼓江南岸歸來夢自驚浮雲世事改孤月此心明雨
已傾盆落詩仍翻水成二江爭送客木杪看橋橫

按茗溪漁隱叢話云東坡自嶺外歸其詩云浮雲世事改孤月此心明語意高妙如參禪悟道之人吐露

胸襟無一毫窒礙

次韻江晦叔兼呈器之

橫空初不跨鵬鵬但覺胡牀步步高

公自注器之言嘗夢飛自覺身與坐

牀皆起空中

一枕晝眠春有夢扁舟夜渡海無濤歸來又見

顛茶陸

公自注往往在錢唐嘗語晦叔陸羽茶顛君亦然

多病仍逢止酒陶

公自注陶

淵明有止酒詩器之小時
飲量無敵今不復飲矣

笑說南荒底處所祇今榕葉

下庭臯

劉器之

宋史劉安世字器之魏人自少持論有識為
丈彥博所器登第不就選從司馬光咨盡心

行已之學哲宗立光薦為秘書正字擢右正言進諫
議大夫時目曰殿上虎東都事畧安世以呂公著之
薦除右正言紹聖初落職知南安軍三年貶新州初
擢言路將以親辭其母曰不可以閨門之私辭君命
及南遷母怡然曰茲事固知如此有集二十卷張子
韶盡言集序云溫公之門多君子一傳而得劉器之
在諫垣時專攻王氏黨扶持正道亦云切矣邵氏見
聞後錄器之與東坡元祐初同朝至元符末歸自嶺
南相遇于
道始交歡

寒食與器之游南塔寺寂照堂

城南鐘鼓鬪清新端為投荒洗瘴塵總是鏡空堂上客
誰為寂照境中人紅英掃地風驚曉綠葉成陰雨洗春
記取明年作寒食杏花曾與此翁隣

投荒

宋史劉器之本傳章惇用事貶新州別駕安置英州投荒七年令甲所載遠惡地無不歷之

慎按秦和志槐安閣在縣之南塔寺黃山谷

為白下宰有詩虔州志亦載之王氏注引杭

州圖經云梵天寺在鳳凰山乾德中吳越王

錢氏建舊額南塢寺與此何涉今駁正

器之好談禪不喜游山山中筍出戲語器之可同

參玉版長老

叢林真百丈法嗣有橫枝

公自注玉版橫枝竹筍也

不怕石頭路來

叅玉版師聊憑栢樹子與問籜龍兒瓦礫猶能說此君

那不知

百丈

傳燈錄洪州百丈山懷海大智禪師福州長樂王氏子嗣焉祖道一禪師南嶽下第二世羅湖

野錄圓通訥禪師嘗言昔百丈大智禪師建叢林立規矩欲救像季不正之弊橫枝高僧傳

嘗于九江見紫雲如蓋下有白雲橫開六岐謂弘忍曰汝知之乎忍曰師之法旁出一枝相踵六世按舊漢叢話東坡嘗與劉器之同參玉版和尚器之欣然從之至廬泉燒笋而食器之覺笋味勝問此何名曰名玉版此老僧善說法要令人得禪悅之味于是器之方悟其戲坡作偈云云此謂盡用禪家語形容可謂善于游戲者也山谷云此老于般若橫說豎說百無剩語非其筆端有舌乎

永和清都觀道士童顏鬢髮問其年生于丙子蓋與予同求此詩

鏡湖勅賜老江東未似西歸玉局翁羈枕未容春夢斷清都宛在默存中每逢佳境攜兒去試問行年與我同

自笑餘生消底物半篙清漲百灘空

公自注予與劉器之同發虔州江水

忽暴漲丈餘贛石三百里無一見者至永和器之解舟先去予獨游清都作此詩

永和

泰和志距縣東北八十里有晉置東昌城隋省入西昌今之永和鎮即其地也吉安志萬安縣

有三鄉曰永和

清都觀

廬陵志清都觀在吉州城南十五里儒林鄉永和鎮南唐

曰誠信曰龍泉

保大間有石基號為西臺宋興國初道士蕭德元結

宇于臺賜額西臺觀治平中改今名蘇軾南歸嘗游

焉為書清都臺三字本集有清都謝道士真贊云謝

道士生丙子真一存長不死欲識清都面目一江春

水東流滔滔直入滄海

道士

姓謝字子和廬陵志載宋畢暉游清都觀記畧云永

海上至蓬萊頂頭

和鎮距城十餘里有觀曰清都子愛其寬閒清曠詢

于主觀道士謝子和蓋肇于南唐保大間卜相啟闢

實自子穆天子傳王執化人之裾騰而上者中默存天玉實以為清都紫微鈞天廣樂帝之

所居既寤王問所從
來左右曰王默存耳

贈詩僧道通

雄豪而妙苦而腴祇有琴聰與蜜殊

公自注錢唐僧思聰總角善琴後舍

琴而學詩復棄詩而學道其詩似皎然而加雄放安語

州僧仲殊詩敏捷立成而工妙絕人殊辟穀常啖蜜

公自注李太白云他人之文如山無烟霞春無草木

帶煙霞從古少氣含蔬筍到

公無

公自注謂無酸餽氣也

香林乍喜聞簷蔔古井惟慚斷轆轤

為報韓公莫輕許從今鳥可是詩奴

道通

按詩人玉屑及石林詩話皆作惠通未詳孰是

酸餽氣

石林詩話近世僧學詩者極多

皆無超然自得之趣往往擬合模放士大夫所殘棄又自作一僧體格律尤俗謂之酸餽氣子瞻有贈惠通詩云語帶烟霞從古少氣含蔬笋到公無嘗語人云頗解蔬笋語否為無酸餽氣也聞者無不失笑

張競辰永康所居萬卷堂

君家四壁如相如卷藏天祿登石渠豈惟鄴侯三萬軸
家有世南行秘書兒童拍手笑何事笑人空腹談經義
未許中郎得異書且與揚雄說奇字清江縈山一作出記碧
玉環下有老龍千古閒知君好事家有酒化為老人夜

扣關留侯之孫書滿腹玉函寶方何用讀濠梁空復五

車多圯上從來一編

一作足篇

張競辰

王氏原注張熙明也餘失考

劉壯輿長官是是堂

閒燕言仁義是非安可無非非義之屬是是仁之徒非
非近乎訕是是近乎諛當為感麟翁善惡分鎔銖抑為
阮嗣宗臧否兩含糊劉君有家學三世道益孤陳古以
刺今紬史行天誅皎皎大明鏡百陋逢一姝鶚立時四

顧何由擾羣狐作堂名是自說行坦途孜孜稱善人不善自遠徂願君置座右此語禹所謨

劉壯輿

宋史劉義仲字壯輿父恕卒七年資治通鑑成追錄其勞官義仲鄧廟齋郎政和中自汝

州召為編修官至京師不謁權要未幾致仕歸廬山一時公卿賦詩三世繼美尤不易云晁以道嵩山集云劉壯輿家于廬山之陽自其祖

父凝之以來遺子孫惟圖書也

是是堂

陳後山是是堂記畧

云劉子義仲佐鉅野架屋以居名曰是是之亭其大父凝之仕不合而去老于廬山之下其父道原面數人短長不避權貴卒窮以死而天下歸重焉今劉子博覽偉辨刻身苦思既嗣其世向善讎惡亦不減其云二父

絕句

柴桑春晚思依依屋角鳴鳩雨欲飛昨日已收寒食火
吹花風起却添衣

慎按此詩施氏原本不載新刻本載續補下
卷以時攷之當是自嶺南歸過西江時作

夢中絕句

楸樹高花欲插天暖風遲日共茫然落英滿地君方見
惆悵春光又一年

楸花

爾雅葉小而散複葉大而散楸詩眼云楸將夏乃繁杜甫詩楸樹高花媚遠天

慎按此詩施氏原本不載今從新刻續補下

卷移編于此

予昔作壺中九華詩其後八年復過湖口則石已為好事者取去乃和前韻以自解云

江邊陣馬走千峯問訊方知冀北空
尤物已隨清夢斷真形猶在畫圖中

公自注道藏有五嶽真形圖

歸來晚歲同元亮却

掃何人伴敬通賴有銅盆修石供
仇池玉色自璵瓏

公自

注家有銅盆貯仇池石正綠色有洞水達背
予又嘗以怪石供佛印師作怪石供一篇

尤物

劉禹錫九華山歌九華山自是
造化一尤物焉能籍甚乎人間

按晁補之雞肋集云元符已卯九月貶上饒贓石鍾
山寺下僧言壺中九華奇怪而正臣不來余不暇往
庚辰七月遇赦北歸至寺下首問之則為當塗郭祥
正以八十千取去累月矣然東坡先生將復過此李
氏室中嘗翠森聳殊形詭觀者固多公一題之皆重
于九華矣云云考先生北歸再過湖口在辛巳春夏
之交距補之留題不過十月此石既為郭功甫
所得先生豈不知之乃云為好事者所取何耶

次韻郭功甫觀予畫雪雀有感二首

一本題云次
韻郭功甫二

首

早知臭腐即神奇海北天南總是歸九萬里風安稅駕
雲鵬今悔不卑飛

可憐倦鳥不知時空羨騎鯨得所歸玉局西南天一角
萬人沙苑看孤飛

郭功甫

名祥正當塗人注見前

附郭功甫原作二首

王氏原注功甫觀先生畫雪雀有感作詩寄惠州云云後

先生北歸又用前韻寄詩云云今采出附錄

平生才力信瑰奇今在窮荒豈易歸正是雪林枝

上畫羽翰雖好不能飛

秋霜春雨不同時萬里今從海外歸已出網羅毛羽在却尋雲跡帖天飛

慎按功甫原作二首青山集中失載王氏注中有之新刻本既附見先生詩題之下續補下卷又訛以秋霜春雨不同時一首為先生作今改正附錄

次韻法芝舉舊詩一首

春來何處不歸鴻
非復羸牛踏舊蹤
但願老師真似月
誰家甕裏不相逢

法芝

名曇秀唱和詩見揚州惠州卷中

次舊韻贈清涼長老

過淮入洛地多塵
舉扇西風欲污人
但怪雲山不改色
豈知江月解分身
安心有道年顏好

一作少

遇物無情句

法新送我長蘆舟
一葉笑看雪浪滿衣巾

按先生南還時過金陵有贈清涼和長老詩在三十七卷

睡起聞米元章冒熱到東園送麥門冬飲子

一枕清風直萬錢無人肯買北牕眠開心暖胃門冬飲

知是東坡手自煎

門冬飲

本集與錢世雄尺牘云昨夕齒中出血專是熱病根源不淺即今諸藥盡却惟取人參和

茯苓麥門冬淪

湯渴即飲之

按紀年錄先生于辛巳五月至常州六月上表請老以本官致仕費袞梁溪漫志亦云東坡北歸至儀真得暑疾止于毘陵顧塘橋孫氏之館惟方嶽深雪偶談叙次最詳東坡自儋北歸卜居陽羨士大夫猶畏而不敢與游獨士人邵民瞻從學于坡為公買宅需緡五百公傾囊僅能贖之卜吉入居既得吉矣夜與

邵步月偶至村落聞婦人哭聲遂推扉而入一老嫗泣曰吾有一居相傳百年吾子不肖舉以售人今日徙此百年舊居一旦訣別所以泣也坡愴然問其居所在即以五百緡得之者也即取屋券焚之呼其子命翼日迎母還舊居不索其直自是遂還毘陵不復買宅借顧塘橋孫氏居暫住焉是年七月竟歿于借居云云據此題中所云東園當在常州而無可攷因載公逸事感嘆及之

夢中作寄朱行中

公自注前一日夢作此詩寄朱行中覺而記之自不曉所謂漫

寫去夢中分明用此色紙也

舜不作六器誰知貴璵璠哀哉楚狂士抱璞號空山相如起睨柱頭璧與俱還何如鄭子產有禮國自閒雖微

韓宣子鄙夫亦辭環至今不貪寶凜然照塵寰

朱行中

宋史朱服字行中烏程人進士甲科紹聖初為中書舍人謫萊州再為廬州徙廣州又坐

與蘇軾游貶海州團練副使蘄州安置吳興備志載朱服所著書有文集十三卷較定六韜六卷孫子三

卷司馬法三卷吳子二卷三畧

三卷其子或亦有蘋洲可談集

按曾端伯百家詩選云東坡寄朱行中一篇北歸時絕筆也又朱升風月堂詩話云朱行中知廣州東坡自海南歸留廣甚久坡還嶺北聞行中在任士大夫頗以廉潔少之至毘陵寄行中詩至今不貪寶凜然照塵寰云云其愛行中至矣蓋不欲正言其事故假夢中作以諷之耳

答徑山琳長老

與君皆丙子各已三萬日一日一千偈電往那容詰大
惠緣有身無身則無疾平生笑羅什神咒真浪出

琳長老

本集雜記云徑山長老惟琳行峻而通文清而麗始徑山祖師有約止以甲乙住持予謂

以適事之宜而廢祖師之約當千偈

晉書鳩摩羅什天竺人年七歲

出家從師受經日誦千偈偈有三
十二字凡三萬二千言義亦自通

按紀年錄七月公疾頗革徑山老惟琳來說偈答云
平生笑摩什神咒真浪出琳問神咒事索筆書昔鳩
摩羅什病亟出西域神咒三番令弟子誦以免難不
及事而終併出一帖云某萬里嶺海不死而歸宿田
里有不起之憂非命也耶蓋絕筆于此後二日殆將
屬續而聞觀先離二十八日公薨年六十六葬汝州

郊城縣釣臺鄉上
瑞里嵩陽峩眉山

附琳長老原作

扁舟駕蘭陵自援舊風日君家有天人雄雄維摩
詰我口吞文殊千里來問疾若以默相酬露柱皆
笑出

蘇詩補註卷四十五

欽定四庫全書

蘇詩補註卷四十六 翰林院編修查慎行撰

今體詩六十五首

慎按施氏原本第四十卷載翰林帖子詞五十四首目錄尚存新刻本刪去又唐人所謂口號皆近體詩也諸刻本獨不錄先生作今從全集采出十一首與帖子詞共成一卷不復編年以存施氏之舊云

春帖子詞

舊注元祐三年

皇帝閣六首

鵲鵲龍旂色琅琅木鐸音數行寬大詔四海發生心

春帖子

本集元日立春詩公自注云立春日翰林學士供詩帖子

木鐸

尚書每歲孟春道人

以木鐸徇于路傳云適人宣令之

寬大詔

後漢書立

官木鐸金口木舌所以振文教
寬大詔曰制詔三公方春東作敬始慎微又侯霸傳
光武徵霸拜尚書令條奏前世善政法度有益于時
者皆施行之每春下寬大之
詔奉四時之令皆霸所建也
發生
爾雅春為青陽一
注六氣十八候皆青陽布發生
之令故養生者必謹奉天時

陽谷賓初日清臺告協風願如風有信長與日俱中

陽谷賓日

尚書傳陽明也日出于谷而天下明故稱陽谷賓導也東方之官敬導日出平均次

序東作之事

協風

陸機詩協風應律鄭若庸類雋協風立春融風也

以務農也

草木漸知春萌芽處處新從今八千歲合抱是靈椿

草木萌芽

月令天氣和同草木萌動

聖主憂民未解顏天教瑞雪報豐年蒼龍挂闕農祥正

一作慶

老稚

石刻作父老

相呼看藉田

蒼龍

漢書天文志東宮蒼龍左角理右角將中華古今注漢蒼龍闕畫蒼龍

農祥正

漢書

天文志晨正房星農事之候

藉田

宋史禮志藉田之禮宋初歲不常講

雍熙四年始詳定儀注除藉田為先農壇以郊後吉亥皇帝親享先農備三獻行三推之禮景德以後因

制損益更鑄麥殿為思文殿

昨夜東風入律新玉闕知有受降人聖恩與解河湟凍得共中原草木春

入律

月令疏律中太族惟主正月之氣宜與東風解凍文次相連角是春時之音律審正月之氣音

由氣成以其音氣相須故律角相同言正月之時候氣之管中于太族陽管為律陰管為呂

翰林職在明光裏行樂詩成拜舞中不待驚開小桃杏

始知天子是天公

明光裏

按明光漢宮名張籍詩良人執戟明光裏

行樂詩

李白有宮中行樂詞又杜甫詩

宮中行

天子是天公

南卓羯鼓錄元宗嘗遇小殿庭柳將吐睹而歎曰對此景物豈

樂秘

可不與判斷乎因遣高力士取羯鼓臨軒縱擊反顧
桃杏皆已微拆上指笑曰此一事不喚我作天公可
乎

太皇太后閣六首

琬刻春何力欣榮物自知發生雖有象覆載本無私

太皇太后

宋史宣仁聖烈高皇后英宗成婚濮邸神宗立尊為皇太后哲宗立尊為太皇太后

小殿黃金榜珠簾白玉鈎一聲雙日蹕春色滿皇州

小殿

即延和殿
注詳下

黃金榜

杜甫詩天門
日射黃金榜

雙日蹕

宋史禮
志哲宗

即位宣仁太皇太后高氏臨朝每朔望六叅帝御前
殿百官起居畢詣內東門進榜子雙日御延和殿同
垂簾日叅官起居太皇太
后移班少西起居皇帝

伏下春朝散宮中晝漏稀兩廂休侍御應下讀書幃

宮中

宋史太皇太后
所居崇慶宮

五日占雲十日風憂勤終歲為三農春來有喜何人見

好學神孫類祖宗

共道十年無臘雪且欣三白壓春田盡驅南畝扶犁手
稍發中都朽貫錢

按宋史本紀哲宗元祐三年春正月復廣惠倉以雪
寒發京西穀五十餘萬石捐其直以紓民罷上元游

幸此首即
記此事

不獨清心能省事應緣克已自銷兵傳聞塞外千君長
欲趁新年賀太平

皇太后閣六首

寶冊瓊瑤重新庭松桂香雪消春未動碧瓦麗朝陽

皇太后

宋史欽聖憲肅向皇后宰相敏中曾孫也神宗在穎邸聘為夫人即位立為后哲宗立尊

為皇寶冊

宋史尊號之冊命大臣撰冊文及書冊寶遣官告天地祖宗社稷皇太后冊禮天子

稱嗣皇帝餘概如尊號儀

瑞日明天仗仙雲擁壽山倚欄春晝永金母在人間

金母

西王母傳在昔道氣凝寂湛體無為以東華玉精之氣化而生木公焉又以西華至妙之氣化

而生金母焉金母生于神州伊川以主陰靈之氣理于西方亦號王母

慎按倚欄墨跡石刻作猗蘭兩存備考

朝罷金鋪掩人間寶瑟塵欲知慈儉德書史樂青春

仙家日月本長閒送臘迎春豈亦

一作亦偶

然翠管銀罌

一作

鉤訛傳故事金花綵勝作新年

翠管銀罌

杜甫詩口脂面藥承恩澤翠管銀罌下九天因學紀聞云東坡春帖用翠管銀罌出

老杜臘日詩而注者改為銀鉤此花勝荆楚歲時記邢子才所以有日思誤書之語也

花勝

人日剪綵為

人或縷金箔為人以貼屏風亦戴之頭鬢賈充李夫人典戒云人日造花勝相貽像瑞圖金勝之形取像

西王母戴勝也杜甫詩勝裏金花巧耐寒

彤史年來不絕書三朝德化婦承姑宮中侍女減珠翠

雪裏貧民得袴襦

彤史

舊唐書宮官有彤史二人正六品

婦承姑

詩續女維莘疏婦之所繼維繼姑耳繼姑

而言維行故能知太妊之德也晉書庾皇后傳坤德尚柔婦道承姑宋史哲宗立尊欽聖憲肅向皇后為皇太后宣仁命葺慶壽宮以居后后曰姑居西而婦居東是實分也因固辭遂以慶壽後殿為隆佑宮居

之減珠翠

李白大鵬賦六宮斥其珠玉百姓樂于耕織

邊庭無事羽書稀閒遣詞臣進小詩共助至尊歌喜事

今年春日得春衣

皇太妃閣五首

葦桃猶在戶椒柏已稱觴歲美風先應朝回日漸長

皇太妃

宋史欽成朱皇后開封人熙寧初入宮生哲宗累進德妃哲宗立尊為皇太妃時宣仁欽

聖二太后皆居尊故稱號未極元祐三年宣仁詔春秋之義母以子貴于是與蓋冠服悉侔皇后

輦

桃東風俗通上古時神荼鬱壘兄弟二人性能執鬼於東海度索山桃樹下簡閱百鬼之無道者縛以葦

索執以飼虎今世畫神像于版椒柏酒詩柏葉隨銘

上以元日置之門戶即其遺意
至椒花日漸長
隋書開皇十九年十一月有司奏元

逐頌來
以來日
景漸長

甲觀開千柱飛樓擢九層雪殘烏鵲喜翔舞下觚稜

甲觀

宋史朱皇后即閣建殿出入由宣德東門百官上踐稱殿下名所居為聖瑞宮

孝心日奉東朝養儉

一作健訛

德應師太姒

一作大練

風太史新

年瞻瑞氣四星明潤紫宮中

東朝

按漢書惠帝東朝長樂宮時呂太后居長樂後世稱太后為東朝其義本此

大練

後漢

書馬皇后紀常衣大練裙不加緣注云大練厚繒也

四星紫宮

漢書天文志中宮天極星其一

明者太一之常居也後句四星末大星正妃後三星後宮之屬也環之廷衛十二星藩臣皆曰紫宮明

潤

晉書天文志文昌六星在北斗魁星前明潤大小齊天臻瑞

九門挂月未催班清禁風和玉漏閒崇慶早朝銀燭下

珮環聲在五雲間

崇慶

太皇太后所居
宮名注見前

東風弱柳萬絲垂的礫殘梅尚一枝
繭館乍欣蠶浴後

禡壇猶記燕來時

繭館

三輔黃圖宮闕疏
云蠶所曰繭館

蠶浴

禮記卜三宮夫人世婦
之吉者使入蠶于蠶室

奉種浴于川疏云近川而為之者取其浴蠶種
便也奉種浴于川者言蠶將生之時而又浴之
禮記月令仲春之月玄鳥至至之日以太牢祠于高
禡注云燕以施生時來巢人堂宇而孚乳娶嫁之象
也宋史禮志仁宗詔有司築高禡壇南郊春分之日
以祀青帝本詩克禋以祓之義以禡從祀報古為禡
之先也祀以簡狄姜嫄○按哲宗朱
太妃所出故以玄鳥生商事比之

夫人閣四首

綵勝鏤新語，酥槃滴小詩。昇平多樂事，應許外庭知。

夫人

宋史馮賢妃東平人初封郡君養女林美人得幸神宗生燕越二王進婕妤好。

慎按元祐初二

人俱在宮中未詳孰是

酥槃滴

黃庭堅詩酥滴花枝綵剪幡

細雨曉風柔，春聲入御溝。已漂新荇沒，猶帶斷冰流。

慎按春深深字石

刻作聲當從之

扶桑初日映簾昇，已覺銅餅暖不冰。七種共挑人日菜，

千枝先剪上元燈。

七種菜

荆楚歲時記正月七日為人以七種菜為羹

千枝燈

鄭嵎津陽門詩注韓國為

千枝燈臺高八十尺每上元夜則然之千光奪目百里之內皆可望見焉

雪消鴛瓦已流澌風暖犀盤尚鎮帷縹緲紫簫明月下

壁門桂影夜參差

壁門

杜牧詩月上白壁門桂影涼參差按石刻作壁門正引用詩語集本作壁從土者訛今改正

端午帖子詞

舊注元祐三年

皇帝閣六首

盛德初融後潛陰未垢時侍臣占易象明兩作重離

盛德

月令孟夏之月某潛陰

按易一陰伏五陽之下名為姤夏至之卦

明

兩

易離卦象曰明兩作離大人以繼明照于四方

采秀擷羣芳爭儲百藥良太醫初薦父庶草驗蕃昌

太醫薦父

後漢書少府所屬有太醫令荆楚歲時記端午日以父為人置戶上辟鬼子由詩云

太醫爭獻

庶草

尚書洪範五者來備各以其叙庶草蕃廡疏云須風則風來須雨則雨來

天師父

各以次序則衆草

木蕃滋而豐茂矣

微涼生殿閣習習滿皇都試問吾民愠南風為解無

慎按藝苑雖黃云東坡詩微涼生殿閣云云原其意蓋欲聖君推南風之德以及于黎庶也唐文宗與柳

公權聯句東坡以公權有美而無箴因續四句又作端午帖子詞用此意也

西檻新來玉宇風侍臣茗椀得雍容庭槐似識天顏喜
舞破清陰作兩龍

侍臣茗椀

按宋制侍講侍讀官例賜酒賜茶本集侍立通英詩有上尊初破早朝寒茗椀仍沾

講舌乾之句

槐龍

按子由入侍通英詩云槐龍對舞覆衣冠自注云通英閣庭前有雙槐甚高而

柯葉覆地如龍蛇

講官進對其下

講餘交翟轉迴廊始覺深宮夏日長揚子江心空百鍊
只將無逸鑑興亡

講餘

宋史凡經筵歲以仲春至端午仲秋至長至講官輪直或便殿或通英閣或間日或每日無

制交翟

播芳大全載集英殿致語云輦出房而雷動扇交翟以雲開謂雉羽扇也江心百

鍊

異聞集天寶中揚州進水心鏡背有盤龍鏡匠呂輝移爐以五月五日于揚子江心鑄之後大旱祀

之得雨白居易百鍊鏡詩江心無逸周書篇名播芳波上舟中鑄五月五日午時

致語云誦書無逸法中宗之不敢康

一扇清風灑面寒應緣飛白在水紈坐知四海蒙膏澤

沐浴君王德似蘭

飛白扇

唐書太宗謂長孫無忌楊師道曰五日舊俗必用服玩相賀朕今各賀君飛白扇二枚庶

動清風以浴蘭
大戴禮浴蘭
湯兮沐華芳

太皇太后閣六首

漸臺通翠浪暑殿轉清風簾卷東朝散金烏未遽中

漸臺

史記孝武本紀作建章宮度為千門萬戶前殿
度高未央其東則鳳闕高二十餘丈其西則唐

中數十里虎圍其北治大池漸臺高二十餘丈
名曰東液注云漸浸也臺在池中為水所浸暑殿

劉禹錫詩奉

君清暑殿

日永蠶收簇風高麥上場朝來藉田令詠黍獻時芳

蠶簇

揚雄元后詠蠶于繭館躬筐執曲帥導羣妾咸循蠶
簇秦處度蠶書屈葉長二尺者自後葉之以為簇以

居蠶 藉田令

山堂考索藉田令周為甸師漢文帝始開藉田置令丞掌耕國廟社稷之田東漢及魏缺

晉復置宋元豐三年改藉田令隸太常寺

菰黍

風土記午日以菰葉裹稻米為糗以象陰陽相包裹未分散也

舞羽諸羌伏銷兵萬彙蘇只應黃紙誥便是赤靈符

赤靈符

抱朴子五月五日作赤靈符書著心前以辟五兵王珪端午詩心前笑指赤靈符

令節陳詩歲歲新從官何以壽吾君願儲醫國三年艾
不作沈湘九辨文

忠臣諒節今千歲孝女孤風滿四方不復巫陽占郢夢
空餘仲御扣河章

忠臣

指屈原

孝女

指曹娥

仲御扣河章

晉書夏統傳母病詣洛市藥會三月

上已士女如雲統並不顧賈充怪而問之徐答曰會稽夏仲御也充使問其土俗又謂曰卿能作土地間曲乎統曰孝女曹娥年甫十四其父墮江不得尸娥仰天哀號便投水而死父子喪尸後乃俱出國人哀其孝義為歌河女之章今欲歌之于是以足扣船引聲喉轉清激慷慨大風應至雷電冥晝諸人相顧曰聞河女之音不覺涕淚交流即謂伯姬高行在目前也

長養恩深動植均只憂貪吏尚殘民外廷已拜臯羹賜應助吾君去不仁

臯羹

史記樂書注五月五日為臯羹賜百官以惡鳥故食之也○按子由端午帖子詞百官起拜臯

羹賜凶去方知舜
有功與詩意同

皇太后閣六首

露簾琴書冷
瑠盤餐餌新
深宮猶畏日
應念暑耘人

瑠盤

開元天寶遺事宮中端午造粉團角黍貯瑠盤中以小角弓射之中者得食

餐

孫愐唐韻

餐諸延切厚粥也

萬壽菖蒲酒
千金琥珀杯
年年行樂處
新月挂池臺

菖蒲酒

王氏彙書評注端午日以菖蒲或縷或屑泛酒

翠筒初裹楝

別本作練

鄉黍復纏菰
水殿開冰鑑
瓊漿凍玉

壺

裏棟

茗溪漁隱叢話新筒裏棟明唐明皇端陽詩也藝苑雌黃云初學記引吳均續齊諧記乃作棟

葉之棟傳寫之訛東坡之意蓋謂棟當作棟耳。慎按仲子陵五絲續命賦棟葉結采絲櫨注云五月五

日祭屈原竹筒貯米以棟塞其上采絲縛之先生正用此事

鄉黍

禮記黍曰鄉黍疏云穀秫者為

黍秫既軟而相合氣息又香故曰鄉合也

秘殿扶疎夏木深雨餘初有一蟬吟應將羸女乘鸞扇

更助南風長棘心

乘鸞扇

劉禹錫詩團扇復團扇奉君清暑殿秋風入庭樹從此不相見上有乘鸞女蒼蒼蟲網編

明年入懷袖
別是機中綫

南風長棘心

詩凱風疏云凱樂之風從長養之方而來吹彼棘木

之心故棘心得盛長以興寬仁之母以慈愛之情養我七子之身故七子皆得少長

上林珍木暗池臺蜀產吳包萬里來不獨槃中見盧橘

時于糴裏得楊梅

上林

漢書上林賦注此雖賦上林博引異方珍奇不繫于一也按先生此詩合四句觀之正合此意

糴裏楊梅

歐陽修詩彩索盤中結楊梅糴裏紅

閔楚遺風萬古情沅湘舊俗到金明翠輿黃繖何時幸

畫鷁飛鳧盡日橫

金明

宋史天子歲時游豫首夏幸金明池觀水嬉

畫鷁

淮南子龍舟鷁首注云鷁水鳥也畫

其像著船首王子年拾遺記乘衝瀾靈鷁之舟或作鷁音義同

飛鳧

張正見詩黃雲迷鳥路白雪下

鳧舟

皇太妃閣五首

午景簾櫳靜薰風草木酣誰知恭儉德綵縷出親蠶

親蠶

宋史禮志先蠶之禮久廢真宗朝禮院上言周禮蠶于北郊以純陰也漢蠶于東郊以春桑生

也請附故事築壇東郊政和間禮局請倣古制于先農壇側築蠶室二十七別構殿一區為親蠶之所詔從其議命親蠶殿以無數為名

雨細方梅夏風高已麥秋應憐百花盡綠葉暗紅榴

麥秋

月令孟夏之月靡草死麥秋至白居易詩洛下麥秋月江南梅雨時

辟兵已佩靈符小續命仍縈綵縷長不為祈禳得天助
要令風俗樂時康

辟兵符

裴玄新語五月五日繫五采繒謂之辟兵符

續命縷

風俗通五月五日以采絲

繫臂謂之續命縷

玉盆浮李艷清泉金鴨虛空裊細烟自有梧楸鄭畏日
仍欣麥黍報豐年

浮李

魏文帝書沈朱李于寒水浮疑當作沈

麥黍

月令孟夏農乃登麥季夏農乃登黍注云

此時黍新熟今蟬鳴黍是也

良辰樂事古難同繡繭

一作縷

朱絲奉兩宮仁孝自應襮

百沴艾人桃印本無功

繡縷朱絲

玉燭寶典端午節文繡金縷帖畫貢獻所尊王珪詩仙艾垂門綠朱絲繞戶長

桃

印

續漢書劉昭曰桃印本漢制所以制惡氣

夫人閣四首

肅肅槐庭午沈沈玉漏稀
皇恩樂佳節關草得珠璣

鬪草

歲時記五日有鬪百草之戲歐陽修端午詞共鬪今朝勝盈襜百草香

節物荆吳舊嬉游禁掖閒仙風隨畫簟拜賜落人間

五綵縈筒秫稻香千門結艾鬢髯張旋開寶典尋風物
要及靈辰共袞襦

寶典

隋書經籍志杜臺卿玉燭寶典二十卷

欲曉銅餅下井欄鏗鏗金殿發清寒似聞人世南風熱
日上牆東問幾竿

興龍節集英殿宴口號

并致語舊注
元祐二年

臣聞帝武造周已兆興王之迹日符祚漢實開受命
之祥非天私我有邦惟聖乃作神主仰止誕彌之慶
集於建丑之正瑞玉旅庭爰講比隣之好虎臣在泮
復通西域之琛式燕示慈與人均福恭惟皇帝陛下
睿思冠古濬哲自天煥乎有文日講六經之訓述而
不作思齊累聖之仁夷夏宅心神人協德卜年七百
方過厯以承天有臣三千咸一心而戴后彤庭振萬
玉座傳觴誦干戈載戢之詩作君臣相悅之樂斯民

何幸白首太平猥以微生親逢盛旦始慶猗蘭之會
願賡擊壤之音下采民言上陳口號

凜凜重瞳日月新四方驚喜識天人共知若木初升旦
且種蟠桃莫計春請吏黑山歸屬國給扶黃髮拜嚴宸
紫皇應在紅雲裏試問清都舊侍臣

興龍節

宋史哲宗本紀十二月初七日帝生日也避禧祖忌辰以次日為興龍節

集英殿

宴

汴京宮室考大慶殿北有紫宸殿西有垂拱殿次西皇儀殿又次西集英殿宴殿也宋史禮志宴饗

凡春秋季仲聖節及國有大慶皆大宴其日殿庭設山樓排場為羣仙隊仗宰相以下升殿進酒各就位

酒九行更衣賜花有差大觀三
給扶南史袁憲傳以功封建安伯除

太子詹事袁請解職不許尋給扶二人唐書元
宗遣徐嶠邀張果至郡辭還山給扶侍二人黃髮

宋史文彥博傳元祐初司馬光薦宿德元老宜起以
自輔乃命平章軍國重事六日一朝一月兩赴經筵

恩禮
甚渥

又興龍節集英殿宴口號

并致語

臣聞天所眷命生而神靈惟三代受命之符萃于茲
日實萬世無疆之福延及我民侯南極之祥輝交北
鄰之瑞節同趨鎬宴爭頌華封恭惟皇帝陛下稽古

溫文秉乾剛粹體生知而猶學藏妙用于何言故得
六聖承休三靈眷佑德隆星晷齊六符而泰階平河
行地中錫九疇而彝倫正屬誕彌之令旦履長發之
嘉祥夙設九賓于庭徧舞六代之樂日無私于臨照
葵藿自傾天有信于發生勾萌必達臣等濫塵法部
獲造彤墀下采民言得三萬里之謠誦登歌壽筭以
八千歲為春秋不度蕪音敢進口號

風卷雲舒合兩班瞳瞳瑞日映天顏觀書已獲千秋鏡

積德長為萬歲山臘雪未消三務起壬人不用五兵閒
相逢父老爭相賀却笑華胥是夢間

合班

宋史職官志唐六典中書門下尚書三省合一
元豐五年中書門下始分元祐初司馬光請令

合班奏事
分省治事

千秋鏡

唐書張九齡傳初千秋節王公並
獻寶鑑九齡上事鑑十章號千秋

金鑑以
申諷諭

五兵

禮記五戎注弓
矢及矛戈戟也

坤成節集英殿宴口號

并致語 舊注元祐
二年七月十五日

臣聞視履考祥既占懷月之夢對時育物必有繼天
之功方大火之西流屬陰靈之既望帝于是日誕降

仁人意使斯民咸歸壽域共慶千秋之遇得生二聖
之朝式燕示慈與民同樂恭惟皇帝陛下文思天縱
濬哲生知力行湯禹之仁常恐一夫之不獲躬蹈曾
閔之孝故得萬國之懽心恭惟太皇太后陛下道契
天人德超載籍知人則哲蓋帝堯之所難修已安民
雖虞舜其猶病風雲從而萬物覩日月照而四時行
自然動植之咸安莫知天地之何力三宮交慶羣后
駿奔寶鄰通四牡之歡航海致重譯之賁洞庭九奏

始識咸池之音靈岳三呼共獻後天之祝臣等叨居
法部輒采民言上瀆宸聰敢陳口號

三朝遺老九門前又見承平大有年文母憂勤初化俗
曾孫仁孝已通天史書元祐三千牘樂奏坤成第一篇
欲采蟠桃歸獻壽蓬萊清淺半桑田

坤成節

宋史聖節立名自唐千秋節始宋因之太皇太后臨朝亦立節按哲宗本紀詔以太皇太

后生日七月十六日為坤成節舊注以為十五日者訛當從本紀

齋日口號

并致語

旋復陰陽配五支于六幹誕彌歲月與元日為三申
神后降慶于當年曾孫效誠于茲旦不煩巧力自契
真符道俗謹謠天人協應太皇太后陛下功高任似
德配唐虞上推顧託之心下布仰成之政寶慈與儉
蹈光憲之成規却狄安邦襲武烈之餘慶三朝順履
萬壽維新雖絳縣之老人難窮甲子如楚南之靈木
莫計春秋臣賤等草茅心傾葵藿采民謳於擊壤效
樂語之陳詩

媯皇得道自神仙金母長生不計年甲子會逢三朔旦
歲星行看兩周天消兵漸覺腰無犢種德方知福有田
彤管何人書後會椒花椿頌一時編

福田

法論云供父母曰恩田供僧佛曰敬田供疾病曰悲田總名之曰福田

椒花頌

晉書

劉臻妻陳氏元旦獻椒花頌

集英殿春宴口號

并致語

臣聞人和則氣和故王道得而四時正今樂猶古樂
故民心悅而八音平幸此聖朝陶然化國飭三農于

保介維莫之春興五福于太平既醉以酒恭惟皇帝
陛下乘乾有作出震無私憲章六聖之典謨斟酌百
王之禮樂天方祚于舜孝人已誦于堯言故得彝倫
敘而水土平北流軌道壬人退而蠻夷服西旅在庭
稍寬中昃之憂一均湛露之澤方將麴蘖羣賢而惡
旨酒鼓吹六藝而放鄭聲雖白雪陽春莫致天顏之
一笑而獻芹負日各盡野人之寸心臣猥以賤工叨
塵法部幸獲望雲之喜敢陳擊壤之音不揆蕪才上

進口號

萬人歌舞樂芳辰長養恩深第四春
令下風雷常有信
時來草木豈知仁
璿璣已正三階泰
玉琯初知九奏均

純一作

更欲年年同此樂
故應相繼得元臣

集英春宴

宋史禮志凡春秋聖節有大慶皆大宴太平興國後止設春宴淳化四年陳靖上言

宴以禮成賓以賢序其有拜起失節宴饌不潔並申嚴制咸平三年始備設春秋大宴學士梁顥請春秋大宴小宴賞花行幸次為四圖頒下閣門遵守故事大宴前一日御殿閱一日戲謂之獨看哲宗初立詔罷獨看元祐三年罷春宴又罷秋宴以魏王出殯翰林學士蘇軾不進教坊致語故也○慎按魏王哲宗

之叔三年因喪廢宴此詩璿璣史記天官書北斗七
元祐四年作故云第四春璿璣星所謂璿璣玉衡以
齊七政注云斗第一天樞第二天璇第三璣第四權第
五衡第六開陽第七搖光第一至第四為魁第五至
第七為杓合而為斗三階天官書魁下六星兩兩相
玉衡屬杓魁為璇璣三階比者名曰三能三能色齊
君臣和注云泰階三台也又黃帝泰玉瑄按此指范
階六符經三階平則陰陽和風雨時玉瑄景仁新樂
也本集和范景仁詩玉瑄猶聞拒泰香自注云舊法
以尺生律今以泰定律以律生尺以宋史考之范鎮
請太府銅鑄律樂成帝與太皇太后御延和殿詔執
政侍從皆往觀乃元祐三年事自是朝會皆用之故
先生詩云玉瑄
初知九奏均也

紫宸殿正旦口號

并致語
注元祐四年舊

臣聞行夏之時正莫加于人統採周之舊王方在於
鎬京惟吉月之布和休庶工而未作使華遠集鄰好
交修萃簪笏于九門來車書于萬里將興嗣歲以樂
太平恭惟皇帝陛下躬履至仁誕膺眷命法天地四
時之運民日用而不知傳祖宗六聖之心我無為而
自化九德咸事三年有成始御八音之和以臨元日
之會人神相慶夷夏來同臣等忝與賤工得親壯觀
知輿情之願頌顧盛德之難形不度荒蕪敢進口號

九霄清蹕一聲雷萬物欣榮意已開曉日自隨天仗出
春風不待斗杓回行看莒葉催耕耤共喜椒花映壽杯
欲識太平全盛事振振鵷鷺滿雲臺

紫宸殿

汴京宮室考大慶殿北有紫宸殿視朝之前殿也宋史禮志宋初大朝會以元日冬至及

五月朔羣臣稱賀上壽若無事不視朝則表賀于閣門常朝之儀唐以宣政為前殿謂之正衙以紫宸為便殿謂之入閣正衙則日見羣臣百官皆在謂之常參後唐明皇始詔羣臣五日一隨宰相入見謂之起居宋因其制皇帝日御垂拱殿文武官日赴文德殿正衙日常參其朝朔望亦于此殿五日起居則於崇德殿或長春殿崇德即紫宸長春即垂拱也元豐官制行詔侍從而上日朝垂拱謂之常參官百司朝官

以上每五日一朝紫宸為六叅官京朝官以上
朔望一朝紫宸為朔叅官望叅官遂為定例
道書赤霄碧霄青霄玄霄絳霄
齡霄紫霄鍊霄縉霄為九霄
耕獲不繼清畊
冷風述遵無廢

集英殿秋宴口號

并致語

臣聞天無言而四時成聖有作而萬物睹清淨自化
雖仰則于帝心豈弟不回亦俛同于衆樂屬此九秋
之候粲然萬寶之成吾王不游何以勞農而休老君
子如喜則必大烹以養賢恭惟皇帝陛下孝通神明

仁及草木行堯禹之大道守成康之小心華夷來同
天地並應以為福莫大于無事瑞無加于有年南極
呈祥候秋分而老人見西夷慕義涉流沙而天馬來
嘉與臣工肅陳燕俎禮元后于三夏諧庶尹于九成
宣示御觴聳近臣之榮觀臚傳天語溢兩廡之歡聲
臣等親觀昌辰叨塵法部采謠言于擊壤助矇眊之
陳詩仰奉威顏敢進口號

霜霏碧瓦尚生煙日泛彤庭已集仙藹藹四門多吉士

熙熙萬國屢豐年高秋爽氣明宮殿元祐和聲入管絃
菊有芳兮蘭有秀從臣誰和白雲篇

白雲篇

杜甫詩晴牕檢點白雲篇
按詩意蓋用漢武秋風辭

黃樓致語口號

百川反壑五稼登場初成百尺之樓適及重陽之會
高高下下既休畚鍤之勞歲歲年年共睹茱萸之美
恭惟知府學士民人所恃憂樂以時度餘力而取羨
材因備災而成勝事起東郊之壯觀破西楚之淫名

賓客如雲來四方之豪傑鼓鐘殷地竦萬目之觀瞻
實與徐民長為佳話

一新柱石壯嚴闈更值西風落帽辰不用游從誇燕子
直將氣燄壓波神山川尚遠當時國城郭猶飄廣陌塵
誰凭闌干賞風月使君留意在斯民

慎按此詩當是元豐戊午守徐州時作集中又有九日黃樓詩見十七卷中注詳前

趙倅成伯母生日致語口號

昔年占夢適當重九之佳辰今日獻香願祝大千之

遐算慶婦姑之同日雜茱菊以稱觴殺雞已效于龐
公翦髮敢資于陶母但某叨居樂部忝預年家不度
蕪材上塵口號

今朝壽酒泛黃花鬱鬱葱葱氣滿家願得唐兒舞一曲
不嫌國小向長沙

唐兒

史記五宗世家長沙定王發之母故程姬侍者
唐兒生子名發以孝景前二年用皇子為長沙

王以其母無寵
故王卑濕貧國

慎按先生知密州趙成伯為倅第十四卷中多唱和
之什此詩為其母生日作後二句引用唐兒事蓋因

所出微而為
解嘲云爾

王氏生子致語口號

人中五日知織女之暫來海上三年喜花枝之未老
事協紫銜之夢歡傾白髮之兒好人相逢一杯徑醉
伏以某人女郎蒼梧仙裔南海貢餘憐謝端之早孤
潛吹相助嘆張鎬之沒興遇酒輒歌采楊梅而朝飛
擘青蓮而暮返長新玉女之年貌未壓金膏之掃除
萬里乘桴已慕仲尼而航海五絲繡鳳將從老子以

俱仙東坡居士尊俎千峯笙簧萬籟聊設三山之湯
餅共傾九醞之仙醪尋香而來萼天風之引步此興
不淺炯江月之升樓

羅浮山下已三春松筍穿階晝掩門太白猶逃水仙洞
紫簫來問玉華君天容水色聊同夜髮澤膚光自鑑人
萬戶春風為子壽坐看滄海起揚塵

太白水仙洞

續仙傳孫思邈隱于太白山學道偶出見牧牛童殺小蛇已傷出血思邈脫身

贖之以藥封裹放于草內復月餘出行見一白衣少年以馬載之偕行如飛到一城郭儼若王者之居少

年延思邈入見一端正美貌袷帽絳衣侍從甚衆俄頃一女子領一青衣小兒出拜曰此兒痴騃爲人哀損取救免害思邈省記嘗救青蛇即訝此何所也潛問左右曰此涇陽水府也留連三日命其子取龍宮藥方三十首與先生此真道者可以救世濟人俄復命僕馬送歸太白山深自以爲異


寒食宴提刑致語口號

良辰易失四者難并故人相逢五斗徑醉況中年離合之感正寒食清明之間時乎不可再來賢者而後樂此恭惟提刑學士才本天授學爲人師事業存乎斯民文章蓋其餘事望之已試于馮翊翁子暫還于

會稽知府學士接好鄰邦締交冊府莫逆之契義等
于天倫不腆之辭意勤于地主力講兩君之好可無
七字之詩欲使異時傳為盛事

雲間畫鼓疊春雷千騎尋芳戲馬臺半道已逢山簡醉
萬人爭看謫仙來淮西按部威猶凜歷下懷仁首重回
還把去年留客意折花臨水更徘徊

慎按元豐戊午先生在徐州有寒食答李公擇三絕
句題中所云提刑當即公擇故以謫仙稱之公擇在
齊州先生曾訪之故又有歷
下懷仁及去年留客之句



蘇詩補註卷四十六

欽定四庫全書

集部

蘇詩補註卷四十八

詳校官麻吉士_臣李傳熊

檢討_臣何思鈞覆勘

總校官原任中允_臣王燕緒

校對官中書_臣王家賓

膳錄監生_臣武先振

欽定四庫全書

蘇詩補註卷四十七 翰林院編修查慎行撰

古今體詩六十四首

慎按吳興施氏原本前後集合三十九卷其
第四十卷則翰林帖子詞五十四首遺詩三
十一首最後兩卷為和陶詩共四十二卷原
注雖殘缺目錄猶存新刻本增續補上下二
卷南行集錯雜其間真贋相半余既取南行

集以冠全詩又依外集于續補卷中排次分
編其漫不可考者凡十九首無從附錄仍置
此卷首此外一百十三首皆慎別行搜採彙
分兩卷各疏出處俾覽者有考焉

戲足柳公權句

并引

宋玉對楚王此獨大王之雄風也庶人安得而共之
譏楚王知己而不知人也柳公權小子與文宗聯句
有美而無箴故為足成其篇

人皆苦炎熱我愛夏日長薰風自南來殿閣生微涼一
為居所移苦樂永相忘願言均此施清陰分四方

殿閣

呂氏家塾廣記云陳輔之以為殿楹生餘涼今世所傳只用公權舊語故東坡端午帖子詞云

微涼生殿閣又獨咏微涼殿閣風不聞有殿楹餘涼之說又按藝苑雌黃云文宗與公權聯句東坡以為有美而無箴因續四句然洪駒父以為公權已含箴規之意雖不必續可也愚謂人臣忠愛其君自當隨事納諫以啟主心而達下情凡作隱躍含糊之語冀幸一悟者皆諂諛之徒也先生此詩特為此一流發偶借公權為質的耳嚴氏之說不足取也

慎按此詩施氏原本載遺詩卷中時地莫考

難以詮次姑仍其舊

送別

鴨頭春水濃如染水面桃花弄春臉
衰翁送客水邊行沙襯馬蹄烏帽點
昂頭問客幾時歸客道秋風黃一作落
葉飛繫馬綠楊開口笑傍山依約見斜暉

寄周安孺茶

大哉天宇內植物知幾族靈品獨標奇
迴超凡草木名從姬旦始漸播桐君錄
賦咏誰最先厥傳惟杜育唐人

未知好論著始于陸常李亦清流當年慕高躅遂使天
下士嗜此偶于俗豈但中土珍兼之異邦鬻鹿門有佳
士博覽無不矚邂逅天隨翁篇章互賡續開園頤山下
屏跡松江曲有興即揮毫粲然存簡牘伊予素寡愛嗜
好本不篤粵自少年時低回客京輶雖非曳裾者庇蔭
或華屋頗見紉綺中齒牙厭梁肉小龍得屢試糞土視
珠玉團鳳與葵花硃硃雜魚目貴人自矜惜捧玩且緘
櫝未數日注卑定知雙井辱于茲自

一作事

研討至味識

五六自爾入江湖尋僧訪幽獨高人固多暇探究亦頗
熟聞道早春時攜簞赴初旭驚雷未破蕾采采不盈掬
旋洗玉泉蒸芳馨豈停宿須臾布輕縷火候謹盈縮不
憚頃間勞經時廢藏蓄髹筒淨無染箸籠勻且複苦畏
梅潤侵暖須人氣燠有如剛耿性不受纖芥觸又若蘆
夫心難將微穢瀆晴天敞虛府石碾破輕綠永日遇閒
賓乳泉發新馥香濃奪蘭露色嫩欺一本作期記秋菊閨俗
競傳誇豐腴面如粥自云葉家白頗勝中山醪好是一

杯深午牕春睡足清風擊兩腋去欲凌鴻鵠嗟我樂何

深水經亦屢讀子

子字疑訛
俟再考

咤中泠泉次乃康王谷癖

培

一作
砿

頃曾嘗餅罌走僮僕如今老且嬾細事百不欲

美惡兩俱忘誰能強追逐薑鹽拌白土稍稍從吾蜀尚

欲外形骸安能徇口腹由來薄滋味日飯止脫粟外慕

既已矣胡為此羈束昨日散幽步偶上天峯麓山園正

春風蒙茸萬旗簇呼兒為招

一作
佳

客采製聊亦復地僻

誰我從包藏付厨簾何嘗較優劣但喜破睡速況此夏

日長人間正炎毒幽人無一事午飯飽蔬菽因卧北牕
風風微動牕竹乳甌十分滿人世真局促意爽飄欲僊
頭輕快如沐昔人固多癖我癖良可贖為問劉伯倫胡

然枕糟麴

按別本自幽人無一事以下
十二句俱脫去今補成篇

植物

周禮一曰山林其植物宜阜物二曰川澤其植
物宜膏物三曰丘陵其植物宜穀物四曰墳衍

其植物宜莢物五曰
原隰其植物宜叢物

桐君錄

桐君藥錄曰巴東有真
茗茶煎飲令人不眠

杜育賦

皮曰休茶經序云晉杜育有荈賦吳興掌故
集載杜育荈賦文多不具錄吳中新刻補注

云育當作毓
不知何據

常李

唐書陸羽傳羽著茶經三篇有常
伯熊者因羽論復廣著茶之功御

史大夫李季卿宣慰江南知伯熊善煮茶召之伯熊執器而前季卿為再舉杯云云。按先生詩中所云

常李亦清流正用陸羽傳中事施氏新本補注
妄引常袞李德裕李約事殊屬支離特為駁正
篇章

按松陵集皮日休有咏茶十
頌山 名勝志頌山在宜興縣東南連靈洞

諸峯屬
葵花 北苑貢茶錄有
驚雷 茗溪漁隱叢話北苑官焙造茶常在

驚蟄後一二日興工採摘是時茶
洗蒸 東溪試茶錄芽已皆一槍蓋閩中地暖如此
濯之必潔洗

之必香一失其
火候 黃儒品茶要錄茶事起于驚蟄度俱為茶病
其采芽如鷹爪初造曰試焙又

曰一火次曰二
乳泉 建寧志鳳凰山有龍焙泉宋時火又次曰三火
貢茶取此水濯之其麓即北苑

面如粥 東溪試茶錄茶生山陰厥味甘香厥色青白及受水則光澤視其面渙散如粟謂之冷粥

面葉家白

學林新編茶之佳品其色白若碧綠者皆常品也東溪試茶錄建茶之名有七一日

白葉茶出于近歲芽葉如紙民間以為茶瑞出壑源之大窠者六葉仲元葉世萬葉世榮葉勇葉世積葉相出壑源巖下者一葉務滋出源頭者二葉團葉肱出壑源後坑者一葉久出壑源巖根者三葉公葉品葉居皆以葉家著名

顏闔

顏闔古有道躬耕自衣食區區魯小邦不足隱明德輶車來我門聘幣繼金璧出門應使者耕稼不謀國但疑誤將命非敢憚行役使者反錫命戶庭空履迹薄俗徇

世榮截趾履之適所重易所輕隋珠彈飛翼伊人畏照
影獨往就陰息鼎俎薦忠賢誰能死燔炙念彼藏皮冠
安知獲堯客

夢雪

殘杯失春溫破被生夜悄開門萬山白俯仰同一照雖
時出圭角固自絕瑕竅兒童勿驚怪一作懼調汝得一笑

圭角

韓愈詩南山偏冬轉清
瘦刻畫圭角出崖竅

戲

一本
作題

贈田辯之琴姬

流水隨絃滑清風入指寒坐中有狂客莫近繡簾彈

田辯之

爵里
失考

書黃筌畫翎毛花蝶圖二首

短翎長喙喜喧卑
曳練雙翔亦自奇
賴有黃鸝鬪嬛好
獨依蘚石立多時

黃筌

皇朝事實類苑國初翰林待詔黃筌以畫著名尤長于花竹并二子居寀居寶弟惟亮皆隸翰

林苑諸黃畫花妙在賦色用筆極新細殆不見墨跡但以輕色染成謂之寫生劉道醇名畫評筌字叔要蜀人善丹青尤好花竹翎毛

綠陰青子已愁人忍見中庭燕麥新
怱悵劉郎今白首
時來看卷覓餘春

寒食夜

漏聲透入碧牕紗人靜鞦韆影半斜
沈麝不燒金鴨冷
淡雲籠月照梨花

和寄天選長官

寓形宇宙間佚我方以老流光安足恃
百歲同過鳥頃
子縈網羅文采緣自表自古山林人
何曾識機巧但記

寒巖翁論心秋月皎黃香十年舊禪學叅衆妙虛懷養
天和肯狗奔走闢官居職事理晨起何用早桐陰滿四
齋叱吏供灑掃眷予東南來野飯煮芹蓼葆光旣清尚
令尹亦高蹈相將古寺行軟語頽晚照公家有畸人

自公

注公有族
人隱嵩山

虛緣能自保

一作
葆

卜築嵩山陽何

一作
行

當從

結好中山饒勝景一覽未易了

一作
飽

何時命中車共陟

雲外嶠翻思

一作
然

筋力疲不復追

一作
時

踊跳公詩擬南

山雄拔千丈峭形容逼天真邂逅識其要籀籀吾未窺

敢議窮閭興

供灑掃

後漢書魏昭請于郭泰願在左右供給灑掃

慎按天選長官失考詩中黃香十年舊當指山谷先生與山谷唱和往往用江夏無雙事疑此詩亦是和黃作而黃山谷集中檢原作復不得

次韻張甥崇美晝眠

炎歊六

一作五

月北牕涼更覺甘如飯稻梁宰我糞牆譏

敢避孝先經笥譴兼忘憂虞心謝知時雁安穩身同掛角羊要識熙熙不爭競華胥別是一僊鄉

掛角羊

傳燈錄羚羊掛角無跡可求

慎按先生之甥柳閑字展如見黃山谷詩集張崇美無可考晁无咎集有和張崇美述志詩與先生集中互見即其人也

陸蓮菴

何妨紅粉唱迎僊來伴
山僧到處禪
陸地生蓮安足怪
而今更有火中蓮

陸蓮

按維摩經云譬如高原陸地不生蓮花陸蓮名庵義本此施氏補注引草木狀云生于陸者曰

旱蓮

火中蓮

維摩經火中生蓮花是可謂希有在欲而行禪希有亦如是永嘉禪師証道歌

訛矣

在欲行禪知見力火中生蓮終不壞唐張謂蓮
花寺詩樓殿總隨烟焰盡火中何處出蓮花

書寄韻

已將鏡鑷投諸地喜見蒼顏白髮新歷數三朝軒冕客
色聲誰是獨完人

投鏡鑷

南史齊鬱林王昭業文惠太子長子也高帝為相王鎮東府時王五歲牀前戲高帝方令

左右拔白髮問之曰兒言我誰耶答曰太翁高帝笑曰豈有為人作曾祖而拔白髮者乎即擲鏡鑷按此乃齊高帝事南史載入廢帝鬱林王

本紀中施氏注以為鬱林王事訛

謁敦詩先生因留一絕

凜凜人言君似雪我言凜凜雪如君時人盡怪蘇司業
不解將錢與廣文

敦詩先生

失考

蘇司業

杜甫詩賴有蘇司業時時
送酒錢按司業名源明

絕句二首

峨峨疊石立何孤賴有蕭蕭翠竹俱日暮無人鷗鳥散
空留野水伴寒蘆

漠漠秋高露氣清新蒲倚石近溪生夜來雨後西風急
靜向牕前似有聲

慎按以上二首
當是題畫詩

春夜

春宵一刻直千金
花有清香月有陰
歌管樓臺聲細細
鞦韆院落夜沈沈

慎按詩人玉屑云東坡春宵一刻直千金云
云與王介甫金爐香燼漏聲殘一首流麗相
似然亦有甲乙施氏原本不載新刻本載續
補下卷今仍之

醉睡者

有道難行不如醉有口難言不如睡先生醉卧此石間
萬古無人知此意

數日前夢人示余一卷文字大畧若諭馬者用吃
蹶兩字夢中甚賞之覺而忘其餘戲作數語足之
天驥雖老舉鞭脫逸交馳蟻封步中衡石旁睨駑駘豐
肉減節徐行方軌動輒吃蹶天資相絕未易致詰

慎按以上十九首從施注新刻續補兩卷中

錄存不拘次序

劉顥宮苑退老于廬山石碑庵顥陝西人本進士

換武家有聲伎

詩缺

慎按此題施氏原本載遺詩卷中題存而詩
亡考之樂城集有陪南康太守訪廬山劉顥
宮苑留題三絕句當即其人也

村醪二尊獻張平陽

萬戶春濃酒似油想須百壺到

一作列

牀頭主人日飲三

千客應笑窮官送督郵

張平陽

失考按萬戶春先生在嶺南酒名此詩疑亦南遷以後所作

詩裏將軍已築壇後來裨將欲登難已驚老健蘇梅在

更作風流王謝看

少一字

出定知書滿腹瘦生應為語雕

肝

少二字

灑落江山水留與人間激懦官

蘇梅

隱居詩話蘇子美以奔放豪健為志梅堯臣亦能詩而平淡為工世謂之蘇梅

張公高躅不可到我欲挽肩纔覺難事業已歸前輩錄
典刑留與後人看詩如啄雪清牙頰身覲飛龍吐胆肝

少負清名晚方用白頭翁竟作何官

慎按右絕句一首律詩二首載宋存理鐵網
珊瑚集元黃文獻公跋云右東坡先生詩凡
六首集中皆闕不載他日好事者或為之補
遺尚有取也至順元年九月二十日後學東
陽黃潛題卞氏式古堂書畫彙考云公手書
真蹟舊藏光福徐良夫教授家後歸徐耕學
成化戊戌吳匏庵為題此卷則已亡其半止

存三首矣又三年鮑庵再觀于詩門錢氏凡
兩跋尾又按外紀所載序錄云東坡詞翰流
落人間不載本集者甚多余從都玄敬出示
墨蹟題云村醪二首獻張平陽其一曰張公
高躅不可到云云其二曰詩如啄雪清牙頰
云云則又以律詩一首分為二絕句矣恐未
可據也

失題

獨鶴南飛送好音
山中橋梓共成陰
深衣偃僂如初命
卮酒從容向晚斟
城裏誰家開壽域
堂東多士作儒林
清霜未落黃花在
笑指高枝繞鬢簪

鶴南飛

按元豐五年冬公在黃州進士李委聞公生日作白鶴南飛新曲以獻此詩疑是謫黃時

所作

慎按卞氏式古堂書畫考載此詩云是東坡

作今采錄

題王維畫

摩詰本詞客亦自名畫師平生出入輞川上鳥飛魚泳
嫌人知山光盎盎著眉睫水聲活活流肝脾行吟坐咏
皆自見飄然不作世俗辭高情不盡落縑素連山絕澗
開重帷百年流落存一二錦囊玉軸酬不貲誰令食肉
貴公子不覺祖父驅熊羆細氈淨几讀文史落筆璀璨
傳新詩青山長江豈君事一揮水墨光淋漓手中五尺
小橫卷天末萬里分毫釐謫官南出止均潁此心通達
無不之歸來纏裹任紆綺天馬性在終難羈人言摩詰

是初世欲從顧老痴不痴桓公崔公不可與但可與我

寬衰遲

公自注桓玄嘗竊長康畫崔圖嘗使摩詰畫壁

慎按右古詩一首載谷橋孫紹遠稽古所葺
聲畫集中今采錄

安平泉

策杖徐徐步此山撥雲尋徑興飄然鑿開海眼知何代
種出菱花不記年烹茗僧誇甌泛雪煉丹人化骨成僊
當年陸羽空收拾遺却安平一片泉

安平泉

咸淳臨安志仁和縣安仁西鄉安隱院在臨平山之南清泰元年吳越王建舊名安貧治

平二年改今額其地產曲竹相傳唐丘隱士丹成羽化植杖于此其竹皆曲竹間有丹井井旁有池名安

平泉東坡

題詩云云

慎按此詩載潛說友臨安志中今采出

和張均題峽山

孤舟轉崑曲古寺出雲坳岸迫鳥聲合水平山影交堂

虛泉漱玉砌靜筍遺苞我為圖名利無因此結茅

張均

失考

題女唱驛

攬轡金房道崎嶇難具陳浮嵐常作雨冷氣不知春少
見寬平路多逢臃腫民欲知何處遠巫峽是西隣

女唱驛

按水經注云江水又東巫溪水注之又逕琵琶峽本志云琵琶峽下女子皆善吹笛嫁時

羣女子治具吹笛唱竹枝詞送之女唱驛之名蓋本于此

慎按以上二首諸刻本俱不載外集編第一

卷入南行集中今補錄于此

溪堂留題

三徑縈回草樹蒙
忽驚初日上千峯
平湖種稻如西蜀
高閣連雲似渚宮
殘雪照山光耿耿
輕冰籠水暗溶溶
溪邊野鶴衝人起
飛入南山第幾重

溪堂

在鳳翔
注見前

新葺小園二首

短竹蕭蕭倚北墻
斬茅披棘見幽芳
使君尚許分池淥
隣舍何妨借樹涼
亦有杏花充窈窕
更煩鶯舌奏鏗鏘
身閒酒美誰來勸
坐看花光照水光

三年輒去豈無鄉種樹穿池亦漫忙暫賞不須心汲汲
再來惟恐鬢蒼蒼應成庾信吟枯樹誰記山公醉夕陽
去後莫憂人翦伐西隣幸許庇甘棠

與李彭年同送崔岐歸二曲馬上口占

霜乾木落愛秦川興發身輕逐鳥翩貪看暮山忘遠近
強陪羽客更流連貂裘犯雪觀形勝駿馬隨鷹搏野鮮
為問南溪李夫子壯心應未逐流年

李彭年

失考

崔岐

失考

二曲

韋曲杜曲也

二月十六日與張李二君遊南溪醉後相與解衣
濯足因咏韓公山石之篇慨然知其所以樂而忘
其在數百年之外也次其韻

終南太白橫翠微自我不見心南飛行穿古縣並山麓
野水清滑溪魚肥須臾渡溪蹈亂石山光漸近行人稀
窮貪愈好去愈銳意未滿足枵如饑忽聞奔泉響巨碓
隱隱百步搖牕扉跳波濺沫不可嚮散為白霧紛霏霏
醉中相與棄拘束顧勸二子解帶圍褰裳試入挿兩足

飛浪激起衝人衣君看麋鹿隱豐草豈羨玉勒黃金鞿
人生何以易此樂天下誰肯從吾歸

按朱子韓文考異于山石詩下引此題作注云見披集此又一証也

送號令趙薦

嗟我去國久得君如得歸今君捨我去從此故人稀不
惜故人稀但恐晤語非西方佳人子佩服貝與璣宛今

若處女未始識戶扉何必識戶扉潛玉有光輝

趙薦

本集第三卷有和號令趙薦大雪詩以此詩起四句考之當是蜀人而宦秦者

蘇詩補註

亡伯提刑郎中挽詩二首甲辰十二月八日鳳翔

官舍書

才賢世有幾廊廟忍輕遺公在不早用人今方見思故
山松鬱鬱舊史印纍纍惟有同鄉老聞名尚涕洟

亡伯

本集蘇廷評行狀云生三子長曰澹先卒次曰
渙以進士得官所至有美稱及去人常思之或

以比漢循吏終於都官郎中利州
路提點刑獄次則軾之先人諱洵

揮手東門別朱顏鬢未霜至今如夢寐未信有存亡後
事書千紙新墳天一方誰能悲楚相抵掌悟君王

謝張太原送蒲桃

冷官門戶日蕭條親舊音書半寂寥惟有太原張縣令

年年專遣送蒲桃

張太原

名字失考

讀晉史

滄海橫流血作津犬羊角出競稱真中原豈是無豪傑

天遣羣胡殺晉人

讀王衍傳

文非經國武非英終日虛談取盛名至竟開門延羯寇
始知清論誤蒼生

王衍

晉書王衍傳總角造山濤濤嗟嘆良久既去目送之曰何物老嫗生此寧馨兒然誤天下蒼生

者未必非此人也又云補元城令終日清談而縣務亦理累居顯職後進之士莫不景慕倣效矜高浮誕遂成風俗焉

讀後魏賀狄干傳

羊犬爭雄宇內殘文風猶自到長安當時枉被詩書誤
惟有鮮卑賀狄干

賀狄干

北史魏賀狄干傳家本小族世為將初帝普封功臣狄干雖為姚興所留遙賜爵襲武侯

及狄干至帝見其語言衣服類中國以為慕而習之故忿焉既而殺之

慎按以上十二首諸刻本不載外集編第三卷在鳳翔作今采錄

入館

黃省文書分道山靜傳鐘鼓建章聞天邊玉樹西風起
知有新秋到世間

入館

宋史國史有三館太宗賜名崇文院端拱初就中堂建秘閣擇三館書籍藏其中凡直昭文館

直史館直集賢院直秘閣與史館修撰直龍圖閣皆為館職高等其次曰集賢校理曰秘閣校理曰館職校勘曰史館檢討均謂之館職記注官缺必于此取之。按先生自鳳翔還朝運直史館此詩必此時作

贈蔡茂先

京城三日雨留人吳市門前訪子真赤腳長鬚俱好事
新詩軟語坐生春鄴侯久有牙籤富太史猶探禹穴新
不惜為君揮尺素却憂善守備三隣

蔡茂先

失考

送司勳子才丈赴梓州

別日已苦迫見日未可期曷不惜此日相從把酒卮人
生初甚樂譬若枰上碁縱橫聽汝手聚散豈吾知胡為
復嗟嘆實恨相識遲念昔非親舊聞名自童兒不見常
隱憂見之百憂披相從未云幾別泪遞已垂有如雲間
鶴影過落寒池舉頭已千里可見不可追我本蜀諸生
能言公少時初為成都掾治獄官苦卑高才絕倫輩邦
伯忘等夷是時最少年白晢未有髭風流能痛飲敏捷
好論詩勇于韝上鷹不啻囊中錐去蜀曾未久得縣復

來眉簿書紛滿前指畫渙無疑一年吏已服漸能省鞭
笞二年民盡信不復煩文移三年厭閒寂終日事桐絲
客來投其轄醉倒不容辭至今三十年父老猶嗟客東
川晚乃至觀者塞路歧但見東人喜不知西人悲如今
又繼往人事亦何奇嗟此信偶然或云數使之王城多
高爵要路人爭馳公來席未暖去不漸晨炊屢為蜀人
得毋乃天見私吾徒本學道窮達理素推況為二千石
所至可樂嬉細思為縣日賓友存者誰或終卧茅屋或

去懸金龜或已登鬼籍墓木如門楣感時何倏忽撫舊
應涕洟紫綬著更好紅顏蔚不衰權奇玉勒馬阿那胡
琴姬逢人可與樂慎勿苦相思

子才

姓名
失考

慎按以上三首諸刻本不載外集編第四卷

直史館時作今補錄

送宋君用遊輦下

暴雨漲荒溪尺水生洪流中有潑潑鯉汎然方快遊安

知赤日爍沸浪生浮漚石密岸狹束鱗鬣窘若囚一失
在藻樂遂有輟鮒憂誓將泛江湖雪此煦沫羞江湖與
荒溪巨細雖不侔此流彼之派聯接詎阻修超然奮躍
去勢若鷹離韝浮沈謝羣蛙窟穴依長洲洗刷沮洳泥
被服白紋裘誰知歲月久湧浪生咽喉賴爾溪中物雖
困有遠謀不似沼沚間四合獄萬鰕縱知有江湖綿綿
隔山丘人生豈異此窮達皆有由吾鄉廣平君少與輕
薄遊堆金等屋梁穠稔百頃秋朝筵羅紅顏夜庖炙肥

牛落魄窮書生多以金帛收高貲一朝盡里巷誰青眸
兒女號饑寒親友寡餽賙中夜起長歎慷慨商聲謳我
非田農家安能事耜耨又非將帥種不慣揮戈矛平生
負壯氣豈可遂爾休今我中丞公位隆職兼優官爵連
九族一門千驂駟雖云富貴殊敢以貧賤投姻戚苦未
遠我困豈我覲八月秋風高駕言動輕輶將行來告別
求贈安敢廋嗟子窮已甚倚伏理亦周溪魚解如此況
子知公侯馬壯僕正健去去其無留

宋君用

失考

咏怪石

家有粗險石植之疎竹軒人皆喜尋玩吾獨思棄捐以
其無所用曉夕空嶄然礧礧則甲斲砥礪乃枯頑于繳
不可斲以碑不可鐫凡此六用無一取令人爭免長物
觀誰知茲石本靈怪忽從夢中至吾前初來若竒鬼肩
股何孱顏漸聞礧礧聲久乃辨其言云我石之精憤子
辱我欲一宣天地之生我族類廣且蕃子向所稱用者

六星羅電布盈溪山傷殘破碎為世役雖有小用烏足
賢如我之徒亦甚寡往往掛名經史間居海岱者充禹
貢雅與鉛松相差肩處魏榆者白晝語意欲警懼驕君
悛或在驪山拒強秦萬牛喘汗力莫牽或從揚州感盧
老代我問答多雄篇子今我得豈無益震霆凜霜我不
遷雕不加文磨不瑩子盍節槩如我堅以是贈子豈不
偉何必責我區區焉吾聞石言愧且謝醜狀歛去不可
攀駭然覺坐想其語勉書此篇席之端

慎按以上二首諸刻本不載外集編第四卷
中先生丁成國太夫人憂居蜀時作今采錄

題西湖樓

少年過了未衰顏正在悲歡季孟間
細雨溟濛湖上寺東風搖蕩酒中山
千金用盡終須老百計尋思不似閒
醉裏下樓知早晚喧喧扶路笑歌還

題雙竹堂壁

江上檣竿一百尺山中樓臺十二重
山僧樓上望江上

遙指檣竿笑殺儂

雙竹堂

注見十一卷雙竹湛師房詩下

風水洞聞二禽

林外一聲青竹筍坐間半醉白頭翁春山最好不歸去

慙愧春禽解勸儂

風水洞

注詳第九卷往富陽新城詩下

法惠小飲以詩索周開祖所作

立著巫娥多少時安排雲雨待清詞酒酣魯叟頻相憶

曲罷周郎尚不知海鷗無蹤飛過速雲龍有報發來遲
從今莫入尋春會為欠梅花一首詩

法惠

杭州寺名注
見第九卷

魯叟

先生倅杭時與魯元翰周開
祖有唱和詩所云魯叟即元

翰也

次韻陳時發太博雙竹

千年誰復繼夷齊凜凜霜筠此鬪奇
要識蒼龍聯蜺意
擬容丹鳳宿凰枝扶持有伴雪應怕
裁剪無人風自吹
莫遣騷人說連理君看高節孰如雌

陳時發

失考

周夫人挽詞

教子通經古所賢
安貧守道節尤堅
當熊遺烈傳家世
投燭諸郎慰眼前
不待金花書誥命
忽驚玉樹掩新阡
凱風吹棘君休咏
我亦孤懷一泣然

周夫人

疑是周開祖之母本卷次韻答開祖詩有蒸豚未害為純孝驪首何妨助故人之句可作

此題
注脚

天聖二僧皆蜀人不見留二絕

家山忘了脚騰騰試作巴談却解磨不為遊人問鄉里
豈知身是錦城僧

方丈門開怪不迎給孤邀供未還城興來且作尋安道
醉後何須覓老兵

會飲有美堂答周開祖湖上見寄

杜牧端來覓紫雲狂言驚倒石榴裙豈知野客青筇杖
獨卧山僧白簟紋且向東臯伴王績未遑南越弔終軍
新詩過與佳人唱從此應難減一分

慎按先生和雲字韻詩凡三首前二首及開
祖原作已載第九卷此詩亦同時作也詩刻
失載今從外集補錄

和吳少卿絕句

欲伴騷人賦百篇歸心要及菊花前明朝知覆誰家甌
猶有桓譚道必傳

吳少卿

名字失考

題沈氏天隱樓

樓上新詩二百篇
三吳處士最應賢
非夷非惠真天隱
忘世忘身恐地僊
散盡黃金猶好客
歸來碧瓦自生烟
靈犀美璞無人識
蔚蔚空驚草木妍

天隱樓

失考

和人登海表亭

譙門對聳壓危坡
覽勝無如此得多
盡見西山遮岱嶺
迴分東野隔新羅
花時千圃堆紅錦
雪晝雙成疊白波
回首毬場尤醒眼
一番風送鑑重磨

海表亭

失考

會雙竹席上奉答開祖長官

松栢蕭蕭滿故丘，知君懷抱尚悲秋。
筭來九九無多日，唱著三三憶舊遊。
皓月徘徊應許共，清詩妙絕不容酬。
梅花社燕難相並，莫為吳娘暗淚流。

次韻答開祖

泪滴秋風不為麟，虛名何用實之賓。
烝豚未害為純孝，狸首何妨助故人。
好喚遊湖緣路便，難邀入社為詩頻。

知君頗有東山興，喝石巖前自過春。

北山廣智大師回自都下過期而歸時率開祖無
悔同訪之，因留淶淨堂竹鶴二絕。

淶淨堂前竹秋期，赴白雲不知緣底事。一日可無君

廣智

失考

無悔

李行中字無悔
注見十二卷

淶淨堂前鶴孤棲，守竹軒胸中無限事。恨汝不能言

欲往湖州見孫華老別公輔希元彥遠醇之穆仲
秋來欲見紫髯翁，待得梅花細萼紅。記取上元燈火夜

道人猶在水晶宮

富陽道中

清晨振衣起起步方池側徘徊俯丹楹倒影見歌仄不
識陶靖節定非風塵格遙懷謝靈運本自林泉客予生
忽世事不以形為役顧彼冕弁人冕弁非予適

慎按自題西湖樓起至此共十八首諸刻本
皆不載據外集編第四卷倅杭時作也今采
錄



贈青澱將謝承制

吾皇有意縛單于，槌破銅山鑄虎符。
驍將新除三十六，精兵共領五千都。
周王常德須攘狄，漢帝雄才亦尚儒。
君學本兼文武術，功名不必讀孫吳。

謝承制

名失考當是由文階
換武職者故題云云

三十六將

注詳第十三
卷寄劉孝叔

詩下

過澱州驛見蔡君謨

一本無
此四字

題詩壁上云綽約新

嬌生眼底逡巡

一本作
優柔

舊事上眉尖，春來試問愁。

多少得似春潮夜夜添不知為誰而作也和一首
長垂玉筍殘粧臉肯為金釵露指尖萬斛閒愁何日盡
一分真態更難添

慎按以上二首諸刻本皆不載據外集編第
五卷自密州移徐州時作今采錄

蘇詩補註卷四十七